

Siunnersuummut oqaaseqaatit

## Oqaaseqaatit nalinginnaasut

### 1. Aallaqqaasiut

Siunnersuutikkut 2021-mut aningaasanut inatsisip akuersissutigineqarnissaanut killiliussaq ullormut 27. november 2020-mut sivitsorneqarpoq. Tamatumalu nassatarisaanik Inatsisartunut kommunalbestyrelsinullu killiliussat arlallit allat sivitsorneqarput, takukkit siunnersuummi immikkoortut pingaernerit aalajangersakkanullu ataasiakkaanut nassuiaatit.

### 2. Siunnersuutip imarisai pingaernerit

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersumi § 15-imi ukioq aningaasanut inatsiseqarfiusoq sioqqullugu kingusinnerpaamik novembarip ulluisa 15-ianni Aningaasanut Inatsit akuersissutigineqartassasoq allassimavoq.

Aningaasanut inatsisissatut siunnersuutip isumaqatiginninniutigineqarnerani piffissamik annertunerusumik pisariaqartitsineq tunuliaqutaralugu, matumuuna 2021-mut aningaasanut inatsisip akuersissutigineqarnissaanut piffissaliussap sivitsorneqarnissaa siunnersuutigineqarpoq.

Tamatumali nassatarisaanik piffissaliussat allat aamma sivitsorneqartariaqarput:

Aningaasarsianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi aalajangersarneqarpoq, nuna tamakkerlugu akileraarutit aamma nuna tamakkerlugu immikkut akileraarutit procentii qaammatsiutit malillugit ukioq pineqartoq sioqqullugu 15. november nallertinnagu Inatsisartunit aalajangerneqartassasut. Procentit akileraarusiissutit aningaasanut inatsisip ilaatut annertussilerneqartarput. Taamaammat siunnersuutaavoq ukioq manna piffissaliussaq, aningaasanut inatsisissap akuersissutigineqarnissaanut piffissaliussaq assigalugu 27. novemberimut sivitsorneqassasoq.

Ukiut siuliini pisartut assignagit, siunnersuutikkut kommunalbestyrelsit 2021-mut missingersuutit kommuninullu akileraarutit kiisalu meeqqanut atualerneqanngitsunut ulluunerani kommunit neqeroorutaannut 2021-mut akinik aalajangersaanissamut sivitsuinermik siunnersuut imaqqanngilaq. Taamaalilluni kommunalbestyrelsit missingersuutit kommunimullu akileraarutit il. il. akuersinissaannut killigitat allanngunngillat.

Akileraartarnermut ingerlatsiviup ukiup nikinnissaa sioqqullugu aningaasaqarnermut aqutsinermik atortorissaarummik nutaamik atulersitsinissamut atatillugu sulisutigut

ilungersortussaannerat tamatumunnga tunuliaqutaavoq. Taamaammat atulersitsinissap peqatigisaanik kommunit kommuninut akileraarummik aalajangersaanissamat killissaasa sivitsorneqarneranut sulisussanik atugassanngortitsisoqarsinnaangilaq. Taamattaaq killissarititaasup ukiup ingerlanerani kingusinnerusumeereenera kiisalu 2020-mut killiliussat assersuutigalugu ullumik ataasiinnarmik kinguartinneqarnerat tamatumani tunngavilersuutigineqarpoq. Taamaalilluni killissarititaasumik sivitsuineq kommunalbestyrelsit missingersuutinik imaluunniit kommuninut akileraarutinik il.il. sulinerannut annertunersumik sunniuteqassangilaq.

### **3. Pisortanut aningaasatigut allaffissornikkullu sunniutissai**

Siunnersuutip pisortanut sunniuteqangaarnissaa naatsorsuutigineqanngilaq. Kisianni aningaasanut inatsisitigut aamma akileraarusiissutissat annertussusaannik akuersissuteqarnissat pisarnermit kingusinnerusukkut pissapput.

### **4. Inuussutissarsiutinik ingerlataqartunut il. il. aningaasatigut allaffissornikkullu sunniutissai**

Siunnersuut inuussutissarsiutinik ingerlataqartunut aningaasatigut sunniuteqanngilaq.

### **5. Avatangiisinut pinngortitamullu sunniutissai**

Siunnersuut avatangiisinut pinngortitamullu sunniuteqanngilaq.

### **6. Innuttaasunut allaffissornikkut sunniutissai**

Siunnersuut innuttaasunut allaffissornikkut sunniuteqanngilaq.

### **7. Naalagaaffeqatigiinnermut Namminersorlutillu Oqartussanut tunngasut**

Siunnersuut Naalagaaffeqatigiinnermut Kalaallilluunniit Nunaata tunngaviusumik inatsisitigut inissisimaneranut sunniuteqanngilaq.

### **8. Oqartussaasunik kattuffinnillu tusarniaaneq**

Siunnersuut piffissakilliorneq pissutigalugu tusarniaassutigineqanngilaq. Siunnersuut Namminersorlutik Oqartussani naalakkersuisoqarfiit attuumassuteqartut isumasiorlugit suliarineqarpoq, soorluttaaq kommunit tamatuminnga ilisimatinneqareersut.

## **Siunnersuummi aalajangersakkanut ataasiakkaanut oqaaseqaatit**

### *§ 1-imut*

Imm 1-imut.

Inatsisartut 2021-imut aningaasanut inatsisaata qaammatisiutit malillugit ukioq akileraarfiusoq sioqqullugu kingusinnerpaamik 27. november akuersissutigineqarnissaa siunnersuutigineqarpoq. Taamaaliornikkut Inatsisartut Naalakkersuisullu pillugit Inatsisartut inatsisaanni § 15, imm. 1-imi piffissaliussaq atuuttoq (15. november) avaqqunneqassaaq.

Imm. 2-mut

2021-mut nuna tamakkerlugu akileraarutip qaammatisiutit malillugit ukioq akileraarfiusoq sioqqullugu kingusinnerpaamik 27. november akuersissutigineqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 61-imi piffissaliussat atuuttoq (15. november) avaqqunneqassaaq.

Imm. 3-mut

2021-mut nuna tamakkerlugu immikkut akileraarutip qaammatisiutit malillugit ukioq akileraarfiusoq sioqqullugu kingusinnerpaamik 27. november akuersissutigineqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 64 imm. 2-mi piffissaliussat atuuttoq (15. november) avaqqunneqassaaq.

### *§ 2-mut*

Inatsisip tamanut nalunaarutigineqarnerata aqaguani atuutilernissaa, ullorlu 1. januar 2021-mi atorunnaarnissaa siunnersuutigineqarpoq.